



KENYATAAN MEDIA

KEMENTERIAN EKONOMI
JABATAN PERANGKAAN MALAYSIA

Blok C6 & C7, Kompleks C,
Pusat Pentadbiran Kerajaan Persekutuan, Presint 1,
62514, Wilayah Persekutuan Putrajaya
No. Telefon : 03 - 8090 4681

PEMBENTUKAN MODAL TETAP KASAR 2024

Pembentukan Modal Tetap Kasar melonjak 12.0 peratus pada tahun 2024, mencapai nilai RM352.3 bilion

PUTRAJAYA, 29 JULAI 2025 – Jabatan Perangkaan Malaysia (*DOSM*) menerbitkan statistik Pembentukan Modal Tetap Kasar (PMTK) 2024. PMTK Malaysia mencatatkan nilai RM352.3 bilion pada harga malar bagi tahun 2024 berbanding RM314.5 bilion pada tahun 2023. Aliran masuk pelaburan asing (*FDI*) yang kukuh serta pertumbuhan pelaburan domestik yang berterusan telah menyumbang kepada Pembentukan Modal Tetap Kasar bagi tahun 2024.

Menurut Ketua Perangkawan Malaysia, Dato' Sri Dr. Mohd Uzir Mahidin, "PMTK kekal sebagai komponen kedua terbesar kepada KDNK merangkumi 21.3 peratus daripada keseluruhan ekonomi. PMTK mencatatkan pertumbuhan dua digit 12.0 peratus pada tahun 2024 berbanding 5.4 peratus pada tahun 2023. Kesemua sektor menunjukkan pembentukan modal lebih kukuh pada tahun 2024, terutamanya bagi sektor Perkhidmatan dan Pembuatan. Pelaburan dalam asset tetap yang tinggi bagi sektor Perkhidmatan didorong oleh subsektor Pengangkutan & penyimpanan dan maklumat & komunikasi dan Kewangan, insurans, hartanah dan perkhidmatan perniagaan masing-masing meningkat 16.4 peratus dan 13.6 peratus."

Selain itu, sektor Pembuatan berkembang 11.8 peratus (2023: 5.4%) diterajui oleh pembentukan modal tetap yang kukuh dalam subsektor Produk elektrik, elektronik & optikal dan peralatan pengangkutan (2024: 15.6%; 2023: 6.5%), diikuti oleh Produk petroleum, kimia, getah dan plastik (2024: 10.4%; 2023: 4.5%). Sementara itu, subsektor Makanan, minuman dan tembakau juga meningkat 10.1 peratus berbanding 9.2 peratus pada tahun sebelumnya. PMTK bagi sektor Perlombongan & pengkuarian bertumbuh 2.4 peratus daripada 2.7 peratus pada tahun 2023. Sementara itu, sektor Pertanian meningkat 3.1 peratus berbanding 0.8 peratus pada tahun 2023, disokong oleh pelaburan yang lebih tinggi dalam subsektor Ternakan & perikanan serta Pertanian lain. Selain itu, sektor Pembinaan meningkat kepada 4.6 peratus daripada 2.6 peratus pada tahun 2023.

Melihat kepada pembentukan modal mengikut jenis aset, Struktur kekal sebagai komponen terbesar yang menyumbang 51.5 peratus (2023: 50.1%) daripada keseluruhan PMTK, melonjak 15.3 peratus pada tahun 2024 berbanding tahun sebelumnya. Selain itu, Peralatan ICT dan jentera & peralatan lain turut mencatatkan pertumbuhan dua digit 14.8 peratus, diikuti oleh Produk harta intelek yang bertumbuh 3.1 peratus pada tahun 2024. PMTK mengikut sektor, sektor Swasta terus menjadi peneraju utama dengan sumbangan sebanyak 77.4 peratus, berkembang 12.3 peratus berbanding tahun sebelumnya. Selain itu, pertumbuhan pelaburan sektor Awam juga menunjukkan trend peningkatan yang sama, merekodkan pertumbuhan 11.1 peratus berbanding 8.5 peratus pada tahun 2023 (sumbangan: 22.6%).

Mengulas lanjut, Dato' Sri Dr. Mohd Uzir Mahidin berkata, "Aktiviti Perkhidmatan dan Pembuatan terus menjadi pemacu utama kepada PMTK sektor Swasta. Sumbangan aktiviti Perkhidmatan meningkat kepada 65.7 peratus (2023: 64.1%). Selain itu, aktiviti Pembuatan mengekalkan kedudukannya sebagai penyumbang kedua terbesar dengan sumbangan sebanyak 22.6 peratus. Sementara itu, aktiviti-aktiviti lain menyumbang 11.7 peratus kepada jumlah PMTK sektor Swasta. Pada masa yang sama, PMTK sektor Awam juga dipacu oleh aktiviti Perkhidmatan yang menyumbang 79.3 peratus. Ini diikuti oleh aktiviti Perlombongan & pengkuarian dan Pembuatan, masing-masing dengan sumbangan sebanyak 10.2 peratus dan 9.6 peratus."

Berbanding dengan negara-negara di rantau ASEAN, beberapa negara mencatatkan prestasi PMTK yang lebih baik pada harga semasa, terutamanya di Indonesia dan Singapura, masing-masing mencatatkan pertumbuhan 10.6 peratus dan 5.4 peratus. Sementara itu, pelaburan aset tetap bagi Thailand bertumbuh 0.4 peratus pada tahun 2024 berbanding tahun sebelumnya.

Statistik PMTK bagi tahun 2022 dan 2023 telah disemak semula berdasarkan laporan tahunan Syarikat yang dikemaskini, Banci Ekonomi 2023 serta data sekunder daripada agensi yang berkaitan. Semakan semula ini berpandukan kepada amalan statistik terbaik selaras dengan piawaian antarabangsa bagi memastikan kebolehpercayaan, kebolehbandingan dan menyediakan statistik yang terkini.

Kepengerusian ASEAN-Malaysia 2025: Jabatan Perangkaan Malaysia (DOSM) akan mempengerusikan Jawatankuasa Sistem Statistik Komuniti ASEAN Ke-15 (ACSS15) yang bertujuan untuk memperkukuh kerjasama statistik ke arah pembangunan serantau yang mampan.

Malaysia buat julung kalinya telah menduduki tangga pertama (1) di peringkat global dalam laporan dwi-tahunan *Open Data Inventory* (ODIN) 2024/25 yang dikeluarkan oleh *Open Data Watch* (ODW), mengatasi 198 negara lain. Pencapaian ini merupakan lonjakan ketara daripada kedudukan ke-67 dalam penilaian ODIN 2022/23.

Kerajaan Malaysia telah mengisytiharkan 20 Oktober sebagai Hari Statistik Negara (MyStats Day), dengan tema 'Statistik Nadi Kehidupan.' Sementara itu, Hari Statistik

Embargo: Hanya boleh diterbitkan atau disebarikan mulai jam 1200, Selasa, 29 Julai 2025

Dunia Keempat akan disambut pada 20 Oktober 2025 dengan tema '*Driving Change with Quality Statistics and Data for Everyone*'.

OpenDOSM NextGen adalah medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.

Dikeluarkan oleh:


**PEJABAT KETUA PERANGKAWAN MALAYSIA
JABATAN PERANGKAAN MALAYSIA
29 JULAI 2025**

LAMPIRAN

CARTA

1


PMTK: Nilai dan Perubahan Peratusan Tahunan pada Harga Semasa dan Harga Malar 2015



CARTA

2

PMTK: Peratus Sumbangan Mengikut Jenis Aktiviti Ekonomi pada Harga Malar 2015



Sumber: Jabatan Perangkaan Malaysia